

四庫全書

集部

欽定四庫全書

蘇魏公文集卷四十五

宋 蘇頌 撰

表

進乾元節功德疏

臣某言伏以虹流協祉駿發於睿圖雲爛當期肇隆于
聖旦屬正陽之紀月邁元聖之誕辰夷夏均懽旄倪共
祝恭惟皇帝陛下祇承大統覆育萬方開隆億世之基

契會千齡之運華封有祝咸傾向日之心神策無疆永
固如山之壽臣竊分列守幸際盛明恭祈龍象之庭增
集天人之福冀憑覺力俯鑒丹誠臣無任

又

臣某言伏以天命有開帝圖惟永是生元聖敷祐斯民
當赤輝照室之辰屬嘉瑞乘陽之序誕承丕緒累洽泰
寧神人鼓舞以均歡山嶽喧呼而効祝臣仰陶盛化叨
守近封將獻壽于南山迺投誠於西竺就嚴紺宇豫集

禪流啓百座之清場演五時之淨教薰修敢怠誠懇必
精允繫最上之緣願益無疆之算臣無任

進乾元節絹

臣某言伏以乾陽膺月震誕紀辰帝齡願祝於天長職
貢敢修于筐實前件絹繭絲攸賦機杼非精蓋充任土
之常用表傾葵之志獲陪旅玉有瀆宸階臣無任

慰仁宗皇帝上仙

臣某言此者上天降禍大行皇帝奄棄萬國伏奉遺詔

摧裂五情臣某中謝恭以大行皇帝聖德仁明超貫前古臨御天下四十二年外無佳兵之虞內絕威刑之弊誠格異類恩結人心奉諱之辰率土震慟伏惟皇帝陛下孝思罔極聖情難居永慕纏綿何可支抑臣恪守支郡阻遠闕廷限以遺旨丁寧不獲赴哀班次臣無任

賀英宗皇帝登極

臣某言伏覩詔書恭承皇帝陛下以四月一日遵奉遺制光臨宸極者上天寶命集我皇家本朝慶靈鍾于嗣

聖當重明之繼照慰萬宇之宅心凡在含生莫不同慶
臣某中賀伏惟皇帝陛下紹四聖之丕緒對千齡之盛
期爰自震闡入奉正統丕承之始洪化維新天地神祇
永依于有道華夷動植咸戴于深仁百靈以和四海大
定臣叨職近序荷知先朝恭聞德音欣逢盛際一麾在
外顧官守之方拘萬玉盈廷赴班聯之莫遂企戀朝闕
飛馳精誠臣無任

又

臣某言伏奉詔書皇帝陛下以四月一日遵奉先猷紹登寶位凡在臣庶永有依歸靡限華夷舉同欣蹈臣某中賀伏以上天眷命我祖宗所以肇基圖本朝慶靈惟聖哲所以膺統業屬兩明繼承之日副羣生欣戴之心大號維新百靈同慶伏惟皇帝陛下天挺明德神贊淵謨恭孝夙展于君親英睿早聞于遐邇爰自震邸入奉乾綱踐阼之初天人之符斯協德音所被雷雨之施惟均萬邦咸懷九鼎增重有以見列聖流光之厚先皇知

子之明善繼善述之謨實超于古昔丕休丕承之烈佇
載于典墳臣預職書林忝麾甸服仰邁重光之運親承
渙汗之恩樂與吏民共慶風雲之會限拘印綬無階朝
闕之趨臣無任

謝英宗皇帝即位大赦

臣某言伏奉四月二日制書可大赦天下常赦不原者
咸赦除之臣即時集本州官吏軍民宣讀告諭施行訖
者風雲會而聖人作雷雨解而品物榮自邇及遐以喜

以忭臣某誠歡誠喜頓首頓首伏以人君發惟新之號
所以麗澤于四方赦令出非常之恩故能鼓舞于羣動
蓋春秋貴謹始之義而典謨重肆眚之文憲章具存今
昔豈異伏惟皇帝陛下荷天明命應運勃興丕承先帝
之謨光臨大寶之位乃於踐阼之旦誕布好生之仁刑
無大小之差悉從原宥官無內外之限咸與躋遷軍和
遍被于頒霑民里周蒙于隱恤舊章畢舉美利無垠人
神為之交歡陰陽以之順序臣叨守州郡親邁盛明伏

讀詔書有祇率舊章之言又有罔敢廢失之戒竊謂陛下虔恭遺旨善述先猷足以感動人心馴致孝治凡在臣子孰不歡欣昔帝堯能放上世之勲成王能酌先祖之道書詩所以稱載聖賢所以詠歌較于茲辰未為遠過昇平之源可見甚盛之德在茲丕基益隆萬世永賴臣限以官守不獲稱慶闕庭無任

謝勅書撫問

臣某言六月二十九日供備庫副使京西路告諭曹繼

明到州伏奉四月十一日勅書一道臣及本州官吏軍
員將校僧道百姓等伏蒙聖慈特賜告諭并傳宣撫問
臣即時稟受施行訖者先皇厭代百姓深喪考之憂嗣
聖纂圖萬物荷由庚之澤矧次甸圻之近首霑雨露之
恩布告俯聞悲歡交至臣其中謝伏惟皇帝陛下體乾
居正繼照代明念綴衣顧託之難思大器置安之重是
以初臨寶座爰軫慮于邇遐臨遣使臣俾慰安于兆庶
皇華所泊丹詔載宣惟郡邑之吏民逮屯防之師旅側

聆天語親見王人莫不感忭于階庭妥寧于閭巷以孝而治德既形于四方丕休其謨功遂流于萬世臣叨分麾守躬被綸言愧無能吏之資上符朝寄姑稟細書之訓下慰民情伏限州印拘縻不獲趨赴闕廷臣無任

進賀英宗皇帝登極絹

臣某言伏以千齡接統屬聖嗣之膺期萬國馳心奉珍財而入贊臣叨聯朝序獲假州符敢陳實筐之儀冀効傾葵之志前件絹出于機杼賦自塵廬蓋任土之所宜

愧充庭之不腆輕塵宰旅有黷典彝謹遣男習應鄉貢進士舉嘉管押詣闕廷上進干瀆宸嚴臣無任

賀光獻皇太后受冊寶

臣某言伏審祇嚴先制誕受鴻名凡在生成率均慶忭臣其中賀伏以皇太后陛下坤元配德陰教移風輔先帝之憂勤廣睿圖之延永荷推尊于徽冊已正位於東朝內治久行比屋皆循乎婦道仁功潛被萬方寅奉于母儀夷夏同歡人神有賴臣守職列郡不獲隨例展慶

闕廷無任

賀太皇太后受冊寶銀絹

臣某言伏以繼祖尊親式頒于顯冊承顏盡孝祇薦于鴻名凡處列邦率虔貢職前件物出于地寶賦厥機工雖非川岳之奇竊効土風之獻充庭不腆發幣惟慙

賀皇太后受冊寶銀絹

臣某言伏以禮冊推崇母儀增重一人達孝首務于尊親萬國歡心式虔于修貢前件物惟金稱美厥篚充名

敢因方物之儀願旅王庭之實懇誠斯在聳忭良深

慰仁宗皇帝陵廟禮畢

臣某言得本州進奏官狀報伏承大行皇帝靈駕以十月二十七日遷座永昭陵神主以十一月四日外祔太廟第八室者萬邦永慕痛仙馭之不留七月如期愴壽宮之永閔凡在臣子孰不摧傷臣某誠悲誠咽頓首頓首伏惟皇帝陛下純孝自天至神紹統繼述之心非怠葬祭之禮以時錮以南山遵霸陵之儉約祔于宗祏致

清廟之肅雍事出宸衷風化天下臣叨聯閭籍限守州
章荷兩朝樂育之恩未酬塵露望百辟駿奔之列如隔
霓霄感咽自中涕洟交集無任

賀同天節

臣某言伏以月紀純乾日躔上宿渚虹樞電夙開載誕
之祥神策寶圖繼撫重明之運臣某中賀恭惟皇帝陛
下秉六陽之嘉會紹五聖之貽謀欽明文思道軼帝華
之盛淳輝惇大世光炎歷之長屬臨出震之辰茂對乘

離之祚函生均慶拱極同歡臣忝守維藩欣逢慶節九
實就列方拘北海之符千里輸誠願獻南山之壽雲天
在望魂爽飛馳臣無任

同天節進功德疏

臣某言伏以四月維夏聖人應世而挺生萬壽無疆天
下傾心而致祝臣叨分遠守甫屬慶辰恭趨龍象之庭
豫集緇黃之侶誦貝多之典願皇圖符仙劫長延諷藥
簡之文冀聖歷與赤明共永歡呼靳嚮倍萬等倫臣無

任

同天節進銀絹

臣某言伏以上聖題期甫邁社鳴之旦庶邦述職虔修
岳貢之儀前件物賦自土毛珍非地寶千年嘉會庶歸
宰旅之常萬壽無疆願協封人之祝臣無任

又

臣某言伏以德水澄瀾適邁聖生之旦侯封任土並趨
王會之期虔奉舊章恭輸菲幣前件絹繭絲攸賦機紵

非工蓋効土風之宜庸歸宰旅之入心存魏闕姑因物以達誠人比華封更望雲而致祝臣無任

賀興龍節

臣某言伏以月帀星回迨隆冬而成歲虹流電繞啓元聖以開祥天道久而四時成聖人作而萬物覩臣某中賀伏惟皇帝陛下體乾嗣歷出震繼明宅九州四海之尊契千載一隆之運無為而守至正稽古而若大猷海寓治安神人協慶適紀吹銅之候肇開貫郊之祥於萬

斯年共聽嵩呼之遠俾富而壽咸傾華祝之誠臣竊食
宮祠便居廬里未改向陽之志徒懷存闕之心上金鏡
之篇顧慚于往哲續南箕之算竅切于愚衷臣無任

又

臣某言伏以上聖膺期本神明之幽讚元冬建丑會日
月之初躔運符龍德之興節紀虹流之旦言遵舊典恭
欵殊庭丕宣大洞之科仰續後天之算伏惟皇帝陛下
睿智神武靜遠疏通因天瑞以紀元布君綱而契道現

赤明之華景夙顯祥經營碧落之真祠適臨誕日臣久
塵位著退老丘園望堯闕以天遙對靈場而心禱覲憑
妙果式薦丹誠伏願皇帝陛下玉歷延鴻金枝衍慶舜
循堯道虞書永協于重華周以宗強文子更登于二五
藩輔保維城之固幅員臻奠枕之安凡在含生普同上
願臣無任

又

臣某言伏以日月會于星紀肇開甲觀之祥富壽祝于

聖人敢效華封之請集陽寥之靜衆諷龍漢之祕文冀
憑神寶之威靈仰贊帝圖之永久伏願皇帝陛下凝神
太紫獨化陶鈞無為無事而造道之真卜年卜世而過
周之歷鄉雲旦旦歌天地清寧之功瓜瓞綿綿享子孫
千億之慶凡屬覆臨之類率同蘄嚮之誠臣無任

興龍節進功德疏

臣某言伏以建丑地正當萬物紐牙之際上弦月宿溝
九龍浴聖之期驗星紀之初躔著倚蘭之令節電樞虹

渚乾坤開靈命之符綬帶絲囊朝野著歡康之盛凡居
戴履共効祝延臣其中賀伏惟皇帝陛下膺淳耀之烈
光宅高明之大寶無為而守至正稽古而若大猷疊穆
顥昂靜淵寅畏丕承先志集下武繼文之勲躬祝上神
遵嚴父配天之禮屬誕彌之在旦紀嘉會之發祥地平
天成仰一人之有慶嵩呼華祝見萬國之歡心臣葵藿
微生江湖遠迹徒切向陽之戀阻陪獻壽之班上金鏡
之篇顧慙于前哲忝琳宮之職輒奉于真科冀憑道力

之希微遠續帝齡之億萬臣無任

又

臣某言伏以星回於天紀季冬之上八帝出乎震嗣祚
歷以無疆偶千齡降聖之辰會百辟稱觴之旦跂瞻堯
闕限層城之九重祇款殊庭奏華封之三祝恭惟皇帝
陛下太微毓粹淳耀膺期聰明睿智以有臨禮樂征伐
之自出雍都獲受命之寶丕顯國祥西母獻益地之圖
屢歸戎捷考六義無以形容盛德備八音不足褒贊成

功姑宣碧落之靈風上慶虹流之誕節伏願皇帝陛下
乾坤齊泰日月並明御氣辨以調元建中和而立極天
授神策萬世福以迎休妣嗣徽音百斯男而集祉民樂
延康之化時颺保定之歌凡處覆臨皆同鼓舞臣無任

賀神宗皇帝徽號

臣某言得本州進奏官報今日日增上神宗紹天法古
運德建功英文烈武欽仁聖孝皇帝徽號者敷揚國典
祇告禰宮聖孝丕昭登明遠布臣其中賀臣聞唐文皇

質傳言兼美大之稱乾始坤生易謂備元亨之德惟先
帝之道豐仁治邁前王之治定功成增上鴻名不宣盛
烈恭以神宗紹天法古運德建功英文烈武欽仁聖孝
皇帝德貫三極恩浹九區興隆典而振宏綱耀德威而
驚荒裔達聰明目雖甚盛德而無以加寬役飭農斯皆
上古之所不及雖經文緯武之號已著而繼天稽古之
業未彰皇帝陛下明發有懷孝思維則倣上世之道繼
彼三墳昭下武之功施于萬禩銘勲簡冊展事宗祊煥

九廟之輝光副羣倫之屬仰臣蚤塵近列獲侍先朝恭
聆大告之行竊深感怍限有一官之守阻與慶班北首
闕門臣無任

賀奉安神宗皇帝御容

臣某言廣曲密之仙都俯隣軒宇宅顓昂之邃表如見
堯牆瞻棣棟之維新仰威靈而如在臣某竊以天子之
孝莫大于尊親朝廷之儀無先于備物方聖主推崇于
禩室本先皇肇建于崇宮增大壘垣聿嚴肖像參酌事

存之訓茲為善述之謀伏惟神宗英文烈武聖孝皇帝
聰明文思淵泉溥博接千齡之統紀紹五聖之基圖臨
御于一十九年之間制作以之詳盡損益乎三五六經
之際聲名由是昭彰邁下武於往初順貽謀于永世皇
帝陛下紹休盛烈循致丕平每懷優渥之恩將極褒尊
之典謂宣光之隆構制有未周闕顯承之重擔禮惟其
稱爰屬告遷之日恭行妥侑之儀陳六寢之几筵竚臨
燕息履四時之霜露間奉烝嘗曲全至備之情文斯盡

先王之愛敬發揮鴻業垂裕多方臣昔事先朝早塵近
列講漢家之故事嘗與咨詢望渭北之衣冠莫遑奔走
北首京闕內切肺腑臣無任

進裕享絹

臣某言伏以大裕之享盛世宜行申至孝以告虔罄函
區而述職臣叨居下土仰覩純儀敢修貢篚之誠庶備
充庭之末前件絹素惟州產出于民租冒瀆宸嚴臣無
任

賀擇皇后

臣某等言伏奉聖旨云云伏以塗山啓夏渭涘興周予
娶于度土之辰親迎于造舟之地若稽盛典適契亨期
將開前寢之模宜謹曲臺之議臣等中賀伏惟皇帝陛
下天錫仁孝日新光明躬親萬幾雖稟東朝之訓表帥
九御尚虛中壺之尊伊欲迓于家邦必先正其服位太
皇太后陛下念宗祊之奉篤風教之先歷詢慶門咨求
淑媛將協定祥之兆當陳備物之嚴嘉命惟行體二儀

之牋合舊章可舉在六禮之親成自納采至于告期由
命使訖乎上禮車服有等幣贄有常古今相沿方冊具
載臣等不勝大願伏望誕頒明詔豫勅奉常考沿革于
前王參節文于通禮制為成式付之有司袞冕穀圭益
重敬昏之義金根駟馬悉全象物之宜足以彰有命之
自天知得賢之配聖靈承億載流化萬分凡在懷生率
同大慶臣等無任

慰宣仁聖烈皇后祔廟

臣某言得本州進奏官報伏承宣仁聖烈皇后以二月十七日升祔英宗皇帝廟室者復土厚陵寧神宣廟仙遊益遠聖孝無窮臣某誠悲誠咽頓首頓首伏以宣仁聖烈皇后母儀三朝君臨九載佐萬幾于房闈治協丕平祔六世于宗祊禮尊配侑恭惟皇帝陛下聿懷祖德永慕慈儀喪過乎哀日月倏踰于祥禋祭致其敬歲時克奉于享嘗臣籍綴殿塗躬縻州組舉朝晡之臨阻預朝班望雲日之遙但馳魂幹臣無任

賀奉安宣仁聖烈皇后神御

臣某言得本州進奏官報今月八日景靈宮徽音殿奉
安宣仁聖烈皇后神御者闢宇殊庭寧神英寢禮成盛
旦化被多方臣某伏以太姒徽音企仙遊而已遠閼宮
有恤奉慈範以如存備法駕之祔威越儀坤之往制伏
惟宣仁聖烈皇后厚德載物正位承天三朝尊奉于母
儀十載輔成于聖政不出房闈憂勤見于動言以御家
邦教令行于中外皇帝陛下躬有虞之克孝纂華國之

維行霜露感懷嘗烝具禮仰視櫟棟既嚴七室之祠出
游衣冠更具四時之薦斯盡享親之義兼隆尊祖之誠
宮廟相望人神胥叶臣近司舊列昔更事于簾帷遠守
餘生阻趨陪于班著北首京闕內切肺腑臣無任

賀紹聖二年明堂禮畢

臣某言闕九筵之太寢奉三歲之親祠熙事訖成湛恩
普被曠然麗澤浹彼寰區臣其中賀伏以嚴父配天所
以教諸侯之孝眚灾肆赦故能得萬國之歡慶逢極治

之辰交舉上神之薦爰推大賚悉舉舊章咸與維新無
遠弗届恭惟皇帝陛下以乾粹離明之德兼堯仁舜孝
之資祇懔寤興敬恭明察念饗帝享親之義思盡志盡
物之誠日至燔柴于泰壇間行大報季秋奠玉于陽館
復舉彝儀郊廟之祝畢修雷雨之施咸暨穰穰降福集
帝祚以無疆堪堪懷生樂聖時而載忭臣圭符守土淮
海縻軀初不獲駿奔明庭躬修助職今乃幸親承疾置
宣布恩書姑與吏民俯同蹈舞

賀紹聖三年元會

臣某言伏以講歲首之儀重元正而謹始受春朝之籍
罄四海以來同方三隅交泰之辰實萬物隸通之候含
生胥慶景福維新臣其中賀伏惟皇帝陛下繼聖膺期
持盈守位積神智天仁之美致功成治定之隆七政以
齊四時合序肇屆履端之旦躬臨正宁之朝鐘簴充庭
衣冠就列梯航重譯傾衆星拱極之心椒栢稱觴同萬
壽無疆之獻臣職叨真館恩假便居想八閩于鈞天幾

形夢寐望九賓于漢殿莫聽臚傳仰祝帝齡漫馳魂幹
臣無任

賀立淑妃劉氏為皇后

臣某言伏聞九月二十七日文德殿發冊寶皇后成禮
者建大長秋之官屬仰奉四星之居進內司服之禕衣
丕承三冊之命儼尊稱于皇極崇位號于中宮慶集宸
闈風行寓縣中外臣庶鼓舞欣歡臣某中賀臣聞自古
守文之君必有內德之助二南正始之道是為王化之

基蓋以主宗廟之祿將化天下以婦道嚮非合成湯之
法相何以配上帝之正妃允茲椒掖之賢茂對紫庭之
選恭惟皇帝陛下憲章文武效法乾坤愛敬曲盡于兩
宮仁恩溥洽于四海卓有覩天之貴夙膺履武之祥翕
受純禧協敷陰教彤管有煒既貽則于九嬪象服是宜
將垂福於萬世臣蚤塵班著老退江湖欣聆郵置之傳
竊贊家邦之美天枝繁衍式符周祗之綿綿國本延長
更祝軒丘之五五伏限在遠不獲奔走闕廷臣無任

賀生皇子越王

臣某言伏覩德音八月八日皇子降生者大人繼明增
煥前星之象長子主器肇開甲觀之祥夷夏宅心邇遐
均慶臣某中賀伏惟皇帝陛下恩被動植孝通神明貺
其德音若重華之協帝措之事業同下武之繼文是宜
蒙天地之休予以篤家邦之慶迺仲秋之令日寔上嗣
之膺期嘉瑞藹乎宮闈湛恩浹乎寰宇龍犀日角已彰
岐嶷之姿海潤星輝永副元良之望臣早塵班著老退

丘園請聖人之多男允諧華祝上天子之萬壽徒效嵩
呼雖阻奔馳深深蹈詠臣無任

元符三年慰哲宗皇帝上仙

臣某言此者上天降禍大行皇帝奄棄萬國伏聽遺詔
摧裂五情臣某誠殞誠擗頓首頓首恭以大行皇帝睿
智聰明繼志神考德威烜赫瑞應屢臻四夷八蠻罔不
率俾仙游厭世宮車上賓率土哀號孺慕悲切伏惟皇
帝陛下天倫至愛聖情難居追愴感懷何可開抑臣限

以老病退居間里不獲奔走道途赴哀班次臣無任

慰欽聖皇后上仙

臣某言伏覩今月十四日大行皇太后遺誥凡在臣庶罔不悲號臣某誠哀誠咽頓首頓首恭惟皇太后母儀三朝化被四海復辟嗣聖歸神昊穹皇帝陛下追慕慈幃悲纏宸極孝思罔切聖情難居伏望以宗社為懷副寓縣所望少抑哀抱以納福休臣嘗與近班屬在羸老不獲奔走道路赴哀班次臣無任

熙寧賀斷絕大理

臣某言竊以圜圉空虛周美成康之盛禁網疏闊漢稱
文景之隆蓋教化行而俗醇則刑罰措而民服視今之
治與昔為侔恭惟皇帝陛下出震垂裳乘乾御極不事
征伐攻取以懷殊俗不重賦斂繇役以惠中區草木魚
鼈之微霑濡盛德鰥寡孤獨之賤蒙被深仁上日甫臨
方春啓序治象未出而億兆皆歡寬詔未下而煩苛已
除廷尉無奏讞之留聖政有勝殘之善臣仕逢熙代職

忝從臣未能發言為詩揄揚于樂府誠欲直書其事炳
煥于史編上件斷絕公案欲乞宣付史館臣無任

謝欽恤刑

臣某言進奏院遞到勅書一道賜臣欽恤刑獄臣即時
依稟施行及飜錄下管內諸縣去訖者曦炎可畏聖慮
遐周沛然發于德音欽哉恤于刑辟下逮容繫咸識天
慈臣某中謝伏以國家恭授四時慎用三典每當盛夏
之際俯念幽囚之拘內則齋室親臨閱攸司之讞議外

則使軺案問戒羣吏之煩苛詔書下而寬和禁網號為
疏闊蓋累聖恤人之厚為盛辰致治之原恭惟體天法
道欽文聰武聖神孝德皇帝陛下仁育含生施俾洪造
憫庶民之多辟致五聽之猶繁顧茲叢棘之間或有然
灰之歎于是爰周時訓敷述邦彝頒一札之璽書勅四
方之守長俾親庶獄毋忽一例加墁飾于園牆乃溉濯
于關木疾病者賜之醫藥惇獨者給以饘糜情可哀矜
皆從于末減治當證逮亦戒于淹期恩生囹圄之中歡

泱幅員之內茲甚盛德流于無窮臣任忝守封職當持
法親承聖訓敢急于布宣周察民情務歸于寬簡冀盡
平反之效少紓中昃之懷臣限守州符不獲奔詣闕廷
臣無任

又

臣某言盛德在火式臨蘊暑之辰至仁如天爰念拘縲
之黨特頒深詔訓飭多方本睿慮之好生致函靈之泱
慶臣某中謝伏以國家千齡接統累聖題期哀庶獄之

尚煩恐一夫之失所罪之疑而輒獻情既得而猶矜乃
屬流金之炎載寬叢棘之禁率由欽慎以底治平恭惟
皇帝陛下駿邁先猷稽叅洪造廣虞舜恤刑之志推成
湯扇暘之心顧茲園土之間或興畫地之歎講明常憲
敷布德音勅守長以奉承使容繫之清肅濯其桎梏塗
厥垣牆視皿器之必時蠲藥劑之無闕重輕之繫必致
於安全小大之情不罹于冤滯臣竊分符竹寅奉教條
知禁罔之闊疎惟思止辟味訓辭之深厚敢曠承流庶

無暴戾之尤仰副憂勤之念臣伏限印章所繫不獲遠
詣闕廷臣無任

又


臣某言璇璣齊政時臨建巳之初皇極敷言上念惟刑
之恤祇誦寬和之旨內深惻隱之懷臣某中謝伏惟皇
帝陛下乾健乘時離明燭理布炎帝執衡之令軫武王
蔭暘之仁內則省錄于齋居不忘庶慎外則丁寧于守
吏爰下細書順長育于正陽俾肅清于嚴棘情已得者

仍從讞法罹不逮者悉免稽留至於渴飢疾瘵之人咸有廩給醫治之惠號令出而民說協氣旁流句圜靜而星虛繁刑幾措臣忝分州寄恭被訓辭出繫挺囚姑稟夏時之政承流宣化更勤漢守之忠惟竭疲駑仰酬生覆臣無任

又

臣某言盛德在火天開長育之辰折民惟刑聖有哀矜之訓被詔辭之深厚諭上旨之丁寧恩逮狴牢惠均遐

邇臣某中謝伏惟皇帝陛下躬禹律度畫堯衣冠德教
治而刑罰清誠意修而上下察適紀朱明之候誕敷在
宥之仁念五聽之所求雖存彝憲慮一夫之不獲常軫
淵衷時勅守臣奉宣明令簡核多從于原省瘠飢悉務
於安全廩餉以時寒涼適節歡欣動於幽紮恥格變于
編齊漢網甚疎固有舟魚之漏召棠所茆將消牙鼠之
爭臣叨析左符親承細札對時育物仰遵共理之言出
繫挺囚上廣好生之德敢忘盡瘁少答鴻私臣無任



蘇魏公文集卷四十五

欽定四庫全書

集部

蘇魏公文集卷四十六

詳校官庶吉士_臣朱理

檢討_臣何思鈞覆勘

總校官進士_臣朱鈴

校對官編修_臣陳昌齊

謄錄監生_臣潘鍾瓌

欽定四庫全書

蘇魏公文集卷四十六

宋 蘇頌 撰

表

哲宗皇帝明堂宿殿起居第一表

伏以商飈應律式嚴宗祀之期法駕鳴鑾出就齋居之
次伏惟皇帝陛下聖能饗帝孝極顯親考制度於國陽
肅陳備物致精明於殿幄內盡誠心臣初肄少儀阻陪

熙事躬雖留於紫闥心竊嚮於丹墀

第二表

伏以昭配合宮形四方之孝治凝思正宁儼萬乘之威容伏惟皇帝陛下稽古守文憲天御極歷季秋之吉日躬嚴父之上儀精意感通交神明而有道至和充塞嚮福祉以無疆法駕在行天倪益固

辭免明堂加恩第一表

伏以霈如春之澤滲漉於羣方推出綈之言增陪於多

賦體仁恩之至厚眷涼瑣以何勝

中謝

竊以嚴父配天

本聖人之能饗布德行惠蓋王者之無私凡百辟之在
庭逮九州之修貢從而加寵孰曰匪宜如臣者力僅勝
衣學方肄簡左右就養早依禁闥之榮夙夜在公未踐
朝闈之地例叨進律益負恩顏伏望皇帝陛下堯日照
臨湯雲覆護矜其穉齒未堪國邑之多賜以俞音聽免
綸函之拜由衷之懇得請為期

第二表

伏以命出惟行固難反汗賞如不僭孰敢循牆蓋在義以當然故控誠而未已

中謝

伏以祭有十倫之義職或

逮於翟閤國有千戶之封功必先於閎閱顧臣之分實愧於斯論職則不預於饗祠語功則未趨於班列猥當慶賜之澤懼有僥踰之譏抗章敢辭批札尋下既喻以明神之惠又示以惇族之仁雖仰戴於天慈終未諧於公議伏望皇帝陛下稽參多實詢考事功憐穉弱之無知豈堪多邑諒忱恂之至懇聽罷誤恩渠渠之誠喋喋

是懼

明堂加恩謝哲宗皇帝表

伏以奉昭考而配上帝盛典斯行流厚福而浸黎元庶
工咸泊內省孱莩之質何勝爵土之榮受命彷徨臨深
震惕中謝竊以祭有惠術蓋廣於神休官有攸司乃霑

於帝澤昨季秋之大饗紆上輦之躬行三獻禮成神明
歆而福祉降肆赦恩普勲勞重者爵賞加詎容罔功例
叨布德伏念臣寅緣天屬生長禁庭上承愛育之仁擢

預公侯之例歲時朝請恕綿弱之未任宗祀肅雍復優容其不至逮茲拜慶實謂無名雖嘗列於異辭終莫回於渙令此蓋伏遇皇帝陛下明德恤祀重祿養賢爰頒雷雨之恩遍霑文武之籍在於蒙裨曷稱褒旌幼未有知當事斯語為善最樂冀上合於詔書俾躬處休幸長為於藩屏

謝皇太后表

伏以太寢總章宗祀云舉弱齡裨齒顯制誤加循揆寵

靈交深兢愧

中謝

竊以國家明德恤祀聿嚴報本之儀

至誠感神茂介自天之佑始前期之齋潔逮昧爽之享
恩皆清蹕之躬行有庶工之陪相既畢上儀之舉宜膺
大澤之均伏念臣資乏慧聰年方幼弱主上以同氣之
愛加彼官封太母以含飴之慈重茲鞠育雖玷分茅之
秩未陪奉玉之祠承言綍之嗣頒雖弁髦而不間良慙
冒處罔獲牢辭此蓋伏遇皇太后殿下內德輝光母慈
愛育峻儀中寢治早贊於正拜外位東朝道益光於佑

聖加憐最質致錫龐恩學彼大成庶知潔已以進報茲罔極勉思就養之方

謝皇太妃牋

皇太妃宮閣德魚圖史愛逮宗藩躬朝禮於兩宮贊祀儀於正宇逮此熙成之慶贊揚渙澤之優命數益崇顯侗宣稱責其智效雖未克於宿官習以性成尚可期於學政

冬節賀哲宗皇帝表

伏以律中黃鍾驗一陽之來復天授神筴膺百福以攸
同屬逢至治之辰允協踐長之慶中賀伏惟皇帝陛下
紹膺淳耀纂嗣丕謨三靈昭眷命之祥遂臻治定四海
盡榮懷之美播在詠歌順履良辰茂迎協氣臣承華韞
鄂接潤仙源君恩等於乾坤敢言報稱國壽隆於箕翼
惟罄祝延

賀太皇太后表

伏以復見天地之心象標至日律有陰陽之應氣始黃

宮時肇初辰天開景貺

中賀

伏惟太皇太后陛下德超

三母功被兩朝不下堂而教化成官師式序未窺牖而
內外治朝野無私順履天正之休翕膺神貺之集臣生
蒙鞠育幼被恩榮稽天保報上之言惟思孝敬衍皇極
錫民之義仰贊聖明

賀皇太后表

伏以天行反復應純乾初九之爻元氣回旋肇太極函
三之數紀為令節交舉慶儀

中賀

伏惟皇太后陛下敬

德思任徽音超妙受天下之養理極於尊崇應地道之光功兼於持戴順承天序茂對神釐臣藐在弱齡親承慈育願上萬年之聖壽庶同四海之歡心

賀皇太妃牋

伏以氣由于始星開珠壁之躔道至復亨卦啟地雷之象至和默會多福來同

中賀

伏惟皇太妃宮閣道協二

聖化流六宮茂德內修早應壽房之兆慈儀上極不忘練服之謙氣序更新宮闈增慶某聯華子舍集慶宸居

仰懷愛育之仁但祝延洪之祉

年節賀哲宗皇帝表

伏以太皞司春肇啟發生之候青陽布政茂宣寬大之

恩端朔迎祥人靈胥慶

中賀

恭惟皇帝陛下誠明充性

禮義宅心日就月將益懋緝熙之學任大守重每懷祗

畏之心嚮用純禧茂延景鑠臣幸緣天屬叨備宗藩劒

佩肅儀未預大庭之會椿靈等竦敢祝聖人之年

賀太皇太后表

伏以陽氣發乎童首品物更新斗杓正乎孟陬歲功云

始遂行慶澤孰間華夷

中賀

恭惟太皇太后陛下天造

覆民坤元生物躬先勤儉邁塗山興夏之勞嗣履齊莊

越文母佐周之德屬肇更於春律諒協吉於時和臣幸

邁休明叨蒙養育一元之始方宣木德之仁億萬斯年

願介春祺之茂

賀皇太后表

伏以寶曆更端時紀人正之首條風協序天開獻歲之

祥品物惟新宮闈均慶

中賀

恭惟皇太后殿下名高馬

鄧德嫔皇英古訓是依著彤管女圖之戒前修自警嘉
素裝大練之風導迎上日之和茂對自天之佑臣地親
禁闥才謝維城敢稱椒柏之觴仰祝椿靈之算

賀皇太妃牋

伏以璇璣觀運方齊七政之元椒柏稱觴式重三正之
首風雲淑暢宇宙開明

中賀

恭惟皇太妃宮閣孝奉兩

宮美全四德動中環佩之節謙尊而光居享羶薌之嘗

上安而敬適臨穀旦倍擁繁禧某童稚無知親憐是賴
願介春陽之吉增延耆壽之期

哲宗皇帝明堂宿殿大寧郡王起居第一表

伏以辰房朝覲屆明堂宗祀之期詔蹕晝嚴謹宣室齋
居之慮伏惟皇帝陛下追養繼孝敬神事天度以尋筵
深廣應乾坤之策思其居處寤興忘夙夜之勞臣託庇
禁扃馳神法坐方佩左觴之飾阻趨鳴玉之聯

第二表

伏以世室嚴裡禮莫隆於報本瓊房祇祓道允契於集
虛伏惟皇帝陛下昭顯先猷惇宗元祀四阿重屋倣體
象之圖方太寢南闌致心思之精一言瞻帷幄阻侍典
儀竚聞畢饗於欽柴即遂趨迎於還蹕

咸寧郡王起居第一表

伏以三歲親祠載舉國陽之禮五思致敬聿嚴聖饗之
心伏惟皇帝陛下以舜孝事祖宗以堯文欽歷象明德
恤祀絜牲玉以告虔唯道集虛通神明而有序臣竊懷

幼志仰慕朝儀竚華蓋之天旋肅內班而磬折

第二表

伏以清廟明堂古史合五名之義路朝便坐聖辰躬三日之齋伏惟皇帝陛下欽翼宅心穆清凝命案禮經之宗祀祇事天神即陽館之嚮明昭配禰室肅磬內心之美茂膺虛室之祥

晉寧郡王起居第一表

伏以闢大報之宮對穹昊而肆類告七世之廟奉文考

以配神恭惟皇帝陛下奏孝天儀有懷明發謂物無以稱其德致志一誠惟神有感而必通荷天百祿臣勝衣忝秩拱著末由瞻雲日以馳情姑夙宵而在念

第二表

伏以歲物順成將展合宮之報宸輿夙駕載臨重帟之居恭惟皇帝陛下順考舊章誕修嚴祀規模九室祇崇陟配之儀齊定一心益盡交神之道仰天光之泰豫延帝祉之嘉休

祁國公起居第一表

伏以太室藏儀展季秋之宗祀左房潔慮虔三日之內
齋伏惟皇帝陛下一德清明九功昭序惟聖為能於饗
帝縉典斯行嚴父莫大於配天先期以戒臣纔通方甲
未習朝趨望咫尺之威顏阻晨昏之覲禮

第二表

伏以欽若昊天大舉三年之報稱秩元祀預修百順之
名伏惟皇帝陛下誠致中和功躋巍蕩精名內固有盡

志盡物之虔聖孝兼隆協饗帝饗親之美方履霜之在序想玉食之延休

大寧郡王辭免明堂加恩第一表

伏以陽館宗祈慶涓成於盛節雉庭孚號均嘏福於羣倫徽章例及於近宗最質何勝於異渥

中謝

竊以愛之

欲其富實出至仁之心食之浮於人固有前經之戒隆恩親而既過度分義以難安伏念臣弱甚蘭支華連棟芻有寶玉展親之賜乏大邦維屏之功寵靈已溢於平

時僥倖敢期於嘉命跼高踏厚曷勝長育之慈履薄臨
深祇益兢凌之懼伏望皇帝陛下天聰垂聽雲施無私
深察叩心之誠許收渙汗之命昭大公於羣聽從所欲
於微衷雖曰無知尚思自儆

第二表

伏以恭布由衷之懇既已報聞尚懷不盡之情期於必
達蓋處富貴者欲其長守居高危者防於疾顛涯分或
踰憂悔斯至

中謝

臣聞唐叔分相土之邑本以德封晉

侯啟南陽之田亦由功賞在義則以為寵錫言禮者猶
曰僭踰伏况臣方在幼齡未知官學備數周藩之列蒙
休堯族之親賜命增多省躬曷勝雖天慈篤愛遠追華
萼之情而性資至愚深懼負乘之悔伏惟皇帝陛下刑
家以及國制義而斷思念其本出於至情許以收還於
成命傾心於此待報益虔

咸寧郡王辭免明堂加恩第一表

伏以大饗熙成祭澤普沾於率土陪封衍賦褒章曲被

於孱軀顧優渥之踰涯輒控陳而有請

中謝

竊以加地

進律非有功而莫疇惟器與名慎假人而為寵賞如有
僭受則為虛伏念臣綿弱薄才顓蒙寡識苴茅擁節已
兼華袞之資鳴玉奏章未預外庭之謁逮茲禋慶例進
戶田雖博施之無私敢冒榮而安處伏望皇帝陛下曲
矜幼志特軫清衷收如綸出綍之言免濡翼在梁之刺
庶安分守無玷龍光

第二表

伏以瀝傾愚款祈還益地之恩游捧批章重拜出綸之
誨荷皇慈之至渥揆眇質以知慚情所未安義難自默

中謝

竊以無德而富前史之戒甚明受爵不辭詩人之
譏尤切况臣以髻童之陋早歲蒙土宇之封大纛高牙
位參帥帥之列袞衣朱芾秩視公台之榮奉璋未接於
時髦進戶例霑於祭澤顧孱昧則爵既踰德受亦無功
在朝廷則名以假人衆將啟寵永言及此豈敢遑寧伏
望皇帝陛下軒鑑照微堯旌聽衆下徇寡求之志庶無

僭賞之差罔避繁言尚期可報

普寧郡王辭免明堂加恩第一表

伏以配天盛禮屬熙事之休成麗澤洪恩雖尸臣而畢

逮顧無名而服寵輒瀝懇以祈辭

中謝

竊以恩勝於義

則處之有未安賞非其功則受之為不韙而臣自惟弱
質未親保傳之嚴弗離禁庭已忝王公之貴伏况才非
早慧學謝少成德祿不疇每有鑿墉之戒高明難處竊
懷瞰室之虞何補盛時乃叨厚貺伏望皇帝陛下曲從

人欲特軫天衷察其取少而辭多不為虛矯毋使貪榮而冒寵自速滿盈懇款之誠矜憐是冀

第二表

伏以義有弗安輒具陳於前奏恩無與量猶未賜於俞音敢冒威顏更殫餘懇

中謝

臣聞功多而賞厚則下無

覬覦德薄而位尊則盜思奪伐故聖人慎於賦祿而賢者戒於貪功寵或踰涯滿必招損伏念臣猥緣支屬曲荷眷憐生成皆自於禁中朝夕不離於上側雖帝舜之

惇叙九族明皇之友愛諸王在臣所蒙方古已過若乃
講三年之宗祀致四海之歡心慶未徧於有勞惠乃先
於慈幼僉言靡協衷懇寧安伏望皇帝陛下徇羣議於
大公抑私恩於內治聽從自列亟寢前褒俾無虛受之
譏不累承平之化

祁國公辭免明堂加恩第一表

伏以嚴父而配上帝克享靈心受福以浸黎民布為皇
澤恩猥加於蒙穉衷實負於愧惶

中謝

竊以三歲親祠

禮成而雲施博百官顯相勞著者神惠加凡有褒封莫
非公議伏念臣年纔髫髻質本顓侗託庇宮闈之嚴僅
親方甲之學未能佩玉致阻預於朝趨雖欲奉璋願不
勝於祀事坐糜厚祿已竊重封更叨加地之隆竚益循
牆之畏伏望皇帝陛下廓乾坤之度回日月之明垂諒
丹愚許從避免臣無虛受儻下遂於素懷賞不私親亦
少裨於聖治歷殫危款恭聽俞音

第二表

伏以愚衷惻怛批札丁寧雖螻蟻微誠莫動蓋高之聽

而腹心至意寧虞再瀆之非

中謝

竊以國家若稔古昔

之謨循踵漢唐之制徹疆啟土雖不涖於國都益戶增

租實用疇於功閥而臣躬居禁闥秩視台司未陪鵷鷺

之行弗預豆籩之事驟加多賦濫拜明緡茲謂無名詎

逃顯責伏望皇帝陛下考至公之論盡羣下之情徧覆

兼容誠曰大鈞之默運難進易退庶明小子之有知言

已重陳日冀開可

大寧郡王謝哲宗皇帝加恩表

伏以盛禮休成允答上靈之貺湛恩宣布猥霑近屬之親顧弱植之無堪冒隆私而過厚省循非稱震惕靡寧

中謝

竊以頌載魯封廣彼土田之錫雅歌韓奕美其畝籍之豐方朝廷加惠以懋功非勲德固難於虛受矧多與邑是謂濫恩伏念臣生質無奇穉齡未立託愛本支之未逢辰信厚之時位已列於公侯跡未離於宮禁朝班阻造每慙車服之榮祭澤旁流更衍賦租之數懇辭

莫獲拜貺何名此蓋伏遇皇帝陛下鴻化曲成至仁丕
冒教由內而及外禮先親而後疎建爾國家奉丁寧於
漢策莫於兄弟荷敦睦於周邦言緯所加愧芒並集誓
謹春秋之教庶知忠孝之方上報君親敢忘興寐

謝皇太后表

伏以天子居政教之宮宗祀上帝外朝臨象魏之闕肆
肯多方顧在弱齡均蒙異數辭不敢固制亦難稽
中謝
竊以嚴父配天本一人之孝治布德行惠致萬國之歡

心方齋輅之藏儀有祠官之顯相奔走承序皆勤俎豆
之恭慶賜遂行宜預絲綸之命如臣者稟姿不厚賦祿
已多未聞詩禮之方初尋保傅之傳寵踰三命位並五
侯逮茲祭澤之頒復被戶租之賞載增封食深懼滿盈
竊懷遜爵之誠莫遂循牆之懇此蓋伏遇皇太后陛下
化刑宮壺德茂母儀當聖孝之親祠助夙宵之齋潔優
推恩典實賴鴻私自推輶薄之資未知報稱之所姑勤
問學勉副生成

謝皇太妃牋

皇太妃宮閤以柔明之德當信厚之時奉順東朝風化
行於遠邇佐佑皇極德施徧於親疎蒙陋何知恩章斯
厚惟講求於義理期報稱於慈仁

咸寧郡王謝哲宗皇帝加恩表

伏以禮成宗祀廣推大澤之仁恩及藩臣均有爰田之
賜辭榮弗獲臨寵若驚中謝竊以三歲躬祠莫大帝親
之饗十倫重祭實先爵賞之施況聖上祇慄以事天明

合宮嚴配以昭考烈燎煙既達神靈並下而居歆渙號
式孚卿士悉蒙於褒進宣曲私於公族蓋賚予於善人
儻異至公是為寧僭伏念臣年在髫髻地處崇高初無
宿晤之資早受懿親之獎上方嚴於將享躬不預於駿
奔仰承加等之封自愧無功之賞此蓋伏遇皇帝陛下
廓乾坤之量高卑皆在於函容均雨露之濡動植溥霑
於潤澤惟茲慶錫攸謂異恩宣意頗侗適遭際會維屏
維翰慙無賢智之名為龍為光徒有燕安之幸誓克勤

於幼學期上副於淵慈

謝皇太后表

伏以禮嚴宗祀既格神靈之休恩廣大封猥加蒙稚之

陋遜辭靡遂啟處不遑

中謝

竊以大孝尊親莫先於配

侑聖人饗帝無尚於肅雍嗣講縟儀時惟大事方萬靈
之儲祉有羣后之相祠誕錫言綸式彰惠術茲雖有舊
詎及罔功伏念臣乏秀嶷之姿偶熙平之運早膺典冊
濫界土疆握旄節之榮方有垂髫之愧相豆遷之事曾

無在廟之勞宣圖慶澤之行亦玷恩章之及陪敦井賦
增衍戶封循已踰涯拜嘉增愧此蓋伏遇皇太后陛下
致誠育物昭德睦親奉先聖之詒謀佑清躬之秩祀眷
福祺之丕擁思宗族以共承致乃幼冲有忝斯冒仰答
生成之賜永勤忠孝之心

謝皇太妃牋

皇太妃宮閤道光柔順行著淑均有德有言佐先朝之
內治以享以祀贊太寢之禮成茂推福禧致乃愚幼承

祭之澤既荷賜於龐鴻報國之恩誓竭誠於長立

蘇魏公文集卷四十六

欽定四庫全書

蘇魏公文集卷四十七

宋 蘇頌 撰

表

普寧郡王謝哲宗皇帝加恩表

伏以禮行太室普饗帝親之尊命降外朝大封文武之
列顧惟穉弱均荷寵光拜祝踰涯以榮為懼

中謝竊以

祭祀者有國之大事得其道則神靈歆爵祿者厲世之

至權當其功則士民勸厲逢陽館之歲事爰建端門之
布常天表之應以善祥王言之出為大號凡百在位皆
從享種自匪有勞敢冒優渥伏念臣生非殊稟材謝夙
成幸分慶於仙源早疏榮於節制假王封而述職曾未
造朝望齋輅之親祠莫陪奉裸祗聽告庭之訓首膺加
地之文賁錫過優固辭莫獲恭承典冊如蹈冰淵此蓋
伏遇皇帝陛下懷欽翼以事天克寬仁而濟物爰推忠
澤廣布神休宗室近親獨愧誤恩之厚居家樂善願遵

諄誨之言仰答鴻慈不渝斯志

謝皇太后表

伏以修講上儀推行惠述不間弱齡之陋亟蒙大澤之

均辭寵莫遑拜嘉增惕

中謝

竊有祭以惠下之義欲貴

賤之悉周爵有等功之名顧重輕而必當矧合宮之大

報紆清蹕之親行自王公泊于庶官有來而相祀雖宗

室之霑一命亦莫不在庭茲蒙渙汗之加是謂承神之

貺如臣者以至親受爵以在傳曠官荷鞠育於深宮獲

奉承於慈誨方羣后肆覲既虧輯瑞之儀泊四海駿奔
亦阻奉璋之禮而乃上同將相並進土田雖朝廷尚親
許其尸祿而幼冲加命徒用厚顏此蓋伏遇皇太后殿
下盛德在躬至仁及物愛憐諸子皆均壹於仁慈推贊
鴻恩欲溥施於上下始慙菲質莫稱褒華但勤篤於進
修冀不辜於誨育

謝皇太妃牋

皇太妃宮閣淑哲迪躬慈祥成德養殫四海方昭聖孝

之隆朝事兩宮益厚教風之首愛均穉弱恩錫光榮敢
忘志意之修上副獎提之訓

祁國公謝哲宗皇帝加恩表

伏以講三歲之親祠導迎景貺眷五宗之近屬均錫龐
釐惟是童蒙何勝寵渥

中謝

竊以宗祀而配上帝所以

昭文考之功大賚而富善人所以法周家之訓沆崇盛
典茲謂曠儀劒佩列乎羣賢梯航來乎萬國既得天
之祐遂頒雨露之恩推惠甚優非賢罔預伏念臣年方

在亂學未知方但循悅礪之勤阻奉圭璋之助真封廣
賦荷加錫于原田需牘再辭終難回于渙汗此蓋伏遇
皇帝陛下德侔健順恩被邇遐祭則受福于神靈仁而
敦睦於宗族勲賢並建固慙屏翰之良寵祿已盈更荷
雲天之澤云何報稱乃副敦褒惟遵保傅之儀仰答君
親之賜

謝皇太后表

伏以祭澤疏恩孚號肆覃於海宇國藩增賦徽章不間

於穉蒙拜貺殊優儀年豈稱

中謝

竊以開國之制周人

分列於五侯寔封之名唐室等差於千戶逮今賦祿視
爵加田每緣慶賜之行遂有陪敦之數雖云並逮於親
戚亦將表顯於勲賢恩典所加官儀尤重伏念臣才微
質薄屬近地親粵自勝衣即叨賜命衛昭晉穆已同啟
于廟封沛易楚詩尚未從於師訓更被餽神之惠泛增
多邑之榮匪以職勞坐蒙國寵此蓋伏遇皇太后殿下
睿慈博愛聖度兼容親賢而憐無能式彰母道有澤則

惠及下深助政經致茲誤恩曲加叢陋敢不勤修志意
靡怠晨昏冀少長之有成思靖共而守位

謝皇太妃牋

皇太妃宮閣儀刑宮壺愛篤王家因大祀之熙成贊鴻
休之溥博載循愚薄之稟何預肅雍之陪例沐寵光自
慙忝冒惟勤修於四術期少稱於萬分

大寧郡王冬節賀哲宗皇帝表

伏以周人建子以為正得天之統唐室稱觴而上壽如

日之昇會聖旦之迎長協陽元之萃祉中賀伏惟皇帝
陛下繼承祖烈熙緝治功體堯舜之性仁恩漸有截法
禹湯之論略道契何言四氣均和百嘉茂嚮臣聯榮帝
胄託屬天倫來復屆辰共慶光亨之運童蒙寡職敢忘
善禱之心

賀太皇太后表

伏以一陽來復爰升君子之亨至信在中首重太元之
本維時純祐允集清躬中賀伏惟太皇太后陛下厚德

有容至仁能愛宅尊南面繼思齋之徽音協治泰辰成
保定之大業茂迎穀旦擁佑丕圖臣越在幼齡叨承愛
育允茲逢吉仰二聖之重光願言揚休祈萬年之永祿

賀皇太后表

伏以萼萌於子首六律以為陽運化至無當七日之來
復惟天地之大德合春秋之一元

中賀

伏惟皇太后殿

下子佐帝尊母儀邦教躬服澣濯德茂周南之風情存
謙虛道邁建初之治天正協吉國祉同休臣生長九重

愛均諸子竊慶履長之日輒紆獻壽之誠

賀皇太妃牋

伏以灰飛緹室應嶰律之陽生表正侯臺驗周主之景

至與時茂對同國安榮

中賀

伏惟皇太妃宮閣德緼徽

柔化存恭儉儀刑嬪婦居忘修德之勞輔佐宮朝深念
進賢之志踐迎長日永續修齡某屬預天枝親聯子行
荷愛憐而均厚祝休祉以惟勤

咸寧郡王冬節賀哲宗皇帝表

伏以日在北陸晷景至而萬福生斗行右旋天運周而
四時正允屬光華之旦導迎泰定之祥中賀伏惟皇帝
陛下睿德淵冲聖謨日就堯仁舜孝協至治於典墳夏
質周文繼成功於禮樂丕承天序鞏固邦圖臣幼學未
通嘉辰預慶獻履祥之頌雖略於舊儀贊鼎策之祥佇
符於皇世

賀太皇太后表

伏以六律正時黃鍾生於仲呂三微治歷卦氣起於中

孚適丁來復之辰仰贊無為之治

中賀

伏惟太皇太后

陛下母愛萬方君臨四表乾健坤順措國本於始安雷
動風行運神功於語嘿履茲穀旦嚮彼多祥臣託質宗
枝承華宮禁奉觴上壽仰陪亞歲之儀候景延暉願續
履長之慶

賀皇太后表

伏以魯臺書物時當南至之辰漢琯飛灰侯應陽生之
旦朝儀亞歲人慶履長

中賀

伏惟皇太后殿下婦順宮

朝母儀寰宇勞心曲體藹然東觀之風求賢審官志在
周南之化嘉辰集祉盛德咸宜臣幼未有知恩叨加命
內切報親之念虔傾祝算之誠

賀皇太妃牋

伏以合璧連珠驗初躔於天部撞鍾擊磬動和氣於人
聲曼古以還茲辰為重中賀伏惟皇太妃宮閣位尊啟
母慶襲堯門膺萬乘之承顏允隆孝治致九州之奉養
克協親尊方庶物之含生宜萬靈之來相某聯榮子屬

服寵藩封內深荷德之誠敢效祝年之請

普寧郡王冬節賀哲宗皇帝表

伏以雲物備書占有年之嘉瑞鼓鐘在列謹亞歲之盛儀羣生丕冒於至和率土同傾於善禱

中賀

恭惟皇帝

陛下順天育物稽古守文日就月將益懋緝熙之學陽舒陰懷不渝消長之期動靜得時福釐來舍臣分輝棟
斲託庇宸居神筴效祥寔契聖人之壽祥風應律請宣
太史之書

賀太皇太后表

伏以天施復於子冠三統以紀元日景正乎南驗四時
之協序升平盛際遐邇傾心中賀伏惟太皇太后陛下
德應直方施侔博厚臨朝端拱大凝帝載之熙措國居
安坐視天民之阜一陽來復百順攸宜臣託蔭慈仁承
顏左右物成歲美邁時運之惟新地久天長祝睿齡之
共永

賀皇太后表

伏以清臺課歷考星度於珠躔緹室飛葭侯陽萌於玉
琯繁禧所屆善祝攸同中賀恭惟皇太后殿下柔順積
中憂勤宅志內修陰教不忘驚戒之誠上正母儀思繼
齊莊之德書雲納祉視履加祥臣夙荷親憐方閑簡諒
幸邁踐長之慶願增有永之年

賀皇太妃牋

伏以荔出芸生兆新元之化育日中表正迎愛景之舒
長國有盛儀時為令節中賀恭惟皇太妃宮閣躬循圖

史德茂芝蘭位號愈尊居念滿盈之戒綺紈弗御志有節儉之風方物產之孳萌宜福基之隆厚某幸聯子育託愛親慈敢因稱慶之辰更祝惟新之祉

祁國公冬節賀哲宗皇帝表

伏以堯庭觀象南面視昂星之中漢立建正太初當甲子之朔一元肇始四海蒙休中賀恭惟皇帝陛下清明在躬中正履位進德修業志常念于及時誠意正心化以推於治國彛倫攸敘萬壽無疆臣席慶本支叨榮爵

土願言遐福等岡陵山阜之崇竊聽賡歌贊元首股肱之喜

賀太皇太后表

伏以天運日南周謹占氣之備君人道長漢隆賈至之儀聲教所同邇遐無外中賀恭惟太皇太后陛下誠明盡性睿知有臨淵嘿九重坐格無為之化梯航萬國咸歸至治之朝陰陽調和天地輔相臣叨居親息獲侍慈闈撞黃鍾之宮莫逮八能之士獻瑤池之體願延萬壽

之期

賀皇太后表

伏以緹室飛灰驗元陽之應律觀臺書物占黃祿之為
祥海寓均和宮闈同慶中賀恭惟皇太后殿下徽柔迪
德恭順存誠形閭內之教風躬先節儉享天下之至養
居極尊崇元和肇新戩穀是荷臣承華帝系託質皇幃
願乘來復之亨益介無疆之祉

賀皇太妃牋

伏以日晷極南辨五雲之瑞應斗繩維北兆萬物之豐
盈降福孔多由中及外中賀恭惟皇太妃宮閣處躬淑
慎履德柔謙慈孝兩全母道隆於萬乘寵榮兼至婦儀
著于兩宮肇履陽元茂膺祉福某質惟蒙雅躬託愛憐
敢傾善祝之誠願介延洪之祚

大寧郡王年節賀哲宗皇帝表

伏以春朝上日精歲首時法駕臨朝受四海之圖籍大
庭肆會設九賓之句臚中賀伏惟皇帝陛下受命昊穹

儲神昭曠為政以德體宸極之居中守位曰仁順陽和之布令敏時純嘏允集清躬臣越在穉齡叨塵名數三階有籍莫陪駕驚之行萬壽無疆敢效岡陵之祝

賀太皇太后表

伏以行夏之時斗漸建寅之位立春之日帝臨乘震之司若聖御天以人為統中賀伏惟太皇太后陛下至仁溥博厚德直方獨觀萬化之原體乾之行健廣開衆正之路協泰之氣征肇履三陽玉膺萬壽臣越繇童孺寵

拜官封方元朔之受朝阻陪上列望宸闈而獻祝但罄
精衷

賀皇太后表

伏以律中太簇授時允協於人正歲在敦牂居位適符
於火德慶叢元朔禮備宸庭中賀伏惟皇太后殿下坤

德靜嵩母儀慈愛自家刑國廣治世之教風求賢審官
佐東朝之德化春陽納祉邦祚延休臣年始佩觿榮叨
昨土望九儀之列未遂昕趨奉萬年之觴徒傾善頌

賀皇太妃牋

伏以履端舉正頌歷象以授人開歲發春布陽和之育
物禮標上日朝舉多儀中賀伏惟皇太妃宮閣柔順積
中仁恩逮下奉兩宮之佐餽克謙婦儀膺萬乘之承顏
益隆母道壽祺肇啟天祚丕延某稚齒無知宸居託愛
早受封於茅土尚阻朝趨將獻壽於椒花徒深懇至

咸寧郡王年節賀哲宗皇帝表

伏以履端于始肇開獻歲之祥維春之祺增茂自天之

貺紀為令節式舉多儀

中賀

恭惟皇帝陛下通駿有聲

孝思維則對時育物動植咸遂於生成體仁長人遐邇

寔均于富庶順承穀旦翕受叢禧臣力僅勝衣心勤獻

祝慶從日益朔復朔以無窮德與時升新又新而彌著

賀太皇太后表

伏以大鈞播物幹一氣以會于元治歷明時繫萬事而

正其始新陽溥洽介福維多

中賀

恭惟太皇太后陛下

其仁如天以儉率下廣鴻休于堯緒數法惟時佑駿德

於湯孫世年深永肇履三微之始布宣四氣之和臣屬
忝宗親蓋猶穉弱觴稱廣殿阻陪臚句之儀壽祝南山
更續岡陵之福

賀皇太后表

伏以椒花獻頌前占繁衍之祥柏葉稱觴共祝延長之
慶勸心交集協氣時乘中賀恭惟皇太后殿下翼夏贊

商超任邈妣恩由義制戚里無過盛之權孝與時兼帝
躬歸保佑之德春陽茲始天祉惟新臣藐在幼齡仰依

鴻訓內竊逢辰之幸敢傾獻壽之誠

賀皇太妃賤

伏以玩占於易交當乾卦之九三推歷於書氣應林鍾
之益一福祥所介禁掖攸先中賀恭惟皇太妃宮閣德
協靜專心循恭儉宮庭風偃化蓋自於躬行帝德日躋
功寔均於母愛履端茲始戩穀是膺某方在穉齡早依
慈蔭仰祝綿長之慶冀酬覆育之恩

普寧王年節賀哲宗皇帝表

伏以計羣吏之功能若稽於戴禮受四海之圖籍嗣講
於漢儀神人協和福祚曼衍中賀恭惟皇帝陛下智勇
天錫光輝日新誠致中和民洽好生之德道先敦朴世
陶遷善之風品物同榮慶釐並集臣忝聯棣萼託託宗
藩敢殫傾日之誠仰祝後天之算

賀太皇太后表

伏以春秋謹始之義正次於王大易生物之原帝出乎
震三陽交泰萬壽攸同中賀恭惟太皇太后陛下稟膺

哲之姿躬儉慈之寶擁佑元聖馴致太平之功奄宅多方已臻富庶之教對時元吉納祉無疆臣襲慶宗支叨榮屏翰荷皇慈之鞠育祈天祚之延洪

賀皇太后表

伏以呂令布和逮兆民而施惠漢宮講禮來萬國之貢珍允屬熙辰翕臻純嘏中賀恭惟皇太后殿下道光聖治性迎溫恭儼然象服之儀禮繇德稱訓彼女圖之事功以時修順履端元茂迎釐祚臣生蒙愛育幼被寵榮

願傾葵藿之心冀續岡陵之壽

賀皇太妃牋

伏以獻椒花之頌式重於三正陳白獸之樽方成於九
醞著為令序允格遐休中賀恭惟皇太妃宮閣履德徽
柔秉心淑慎躬先几御倡陰教以踐修工應四星煥紫
垣之明潤履新之慶界祉維繁某年在穉蒙恩承鞠育
仰祝綿長之算倍傾懇至之誠

初國公年節賀哲宗皇帝表

伏以奉元養物肇更正歲之端執規司春首運東神之
化對時欽若介福紛然中賀恭惟皇帝陛下承丕顯之
謨受穆清之命道格於上下率華裔以同風功軼於古
今與皇王而共貫順履三陽之始茂迎六氣之和臣識
昧知方心勤祝聖輝光其德與歲律以俱新億萬斯年
配乾行而彌久

賀太皇太后表

伏以帝乘震位開春序之元朝斗建寅初首人正之朔

旦歡盈朝野慶集震闈中賀恭惟太皇太后陛下躬淑
聖之資宅休明之運體乾坤而御世四海來同建氣物
以乘時五臚咸備坐視璿璣之運順迎玉燭之和臣預
列宗支方居同稱式歌且舞願傾祝聖之心俾壽而臧
永對自天之貺

賀皇太后表

伏以天時潛運日當一氣之元人統更新禮重四時之
首順乘令序交舉歡儀中賀恭惟皇太后殿下德盛覩

天功深應地闕睢化下增隆周道之光長樂居尊崇備
漢儀之奉維時初吉受祉時多臣日侍寢門親承聖訓
茂對三微之始仰祈萬壽之延

賀皇太妃牋


伏以人統得四時之正歷建夏家春朝受萬國之珍禮
崇漢世逖稽舊典備著慶儀

中賀

恭惟皇太妃宮閣德

耀中洲功光彤管儀刑自內居帝嚳四妃之尊均壹為
心得文王十子之慶荷天之寵受祉爰多某榮預宗藩

日親宮壺祝春祺而參會與天序以俱新



蘇魏公文集卷四十七